

四庫全書

史部

欽定四庫全書

史記正義卷一百七

唐 張守節 撰

魏其武安侯列傳第四十七 史記一百七

魏其侯竇嬰者孝文后從兄子也父世觀津人

觀津城在冀州

武邑縣東南

二十五里

喜賓客孝文時嬰為吳相病免孝景初即

位為詹事

百官表云詹事秦官掌皇后太子家也

梁孝王者孝景弟也其

母竇太后愛之梁孝王朝因昆弟燕飲是時上未立太

子酒酣從容言曰千秋之後傳梁王太后驩竇嬰引卮酒進上曰天下者高祖天下父子相傳此漢之約也上何以得擅傳梁王太后由此憎竇嬰竇嬰亦薄其官因病免太后除竇嬰門籍不得入朝請

才性反

孝景三年吳

楚反上察宗室諸竇毋如竇嬰賢乃召嬰入見固辭謝病不足任太后亦慙於是上曰天下方有急王孫寧可以讓邪乃拜嬰為太將軍賜金千斤竇乃言袁盎爰布諸名將賢士在家者進之所賜金陳之廊廡下軍吏

過輒令財取為用金無入家者竇嬰守滎陽監齊趙兵

監音甲衫反吳王濞傳云竇嬰也滎陽監齊趙兵也

七國兵已盡破封嬰為魏

其侯諸游士賓客爭歸魏其侯孝景時每朝議大事條

侯魏其侯諸列侯莫敢與亢禮孝景四年立栗太子

栗姬

之子後廢之故書母姓也

使魏其侯為太子傅孝景七年栗太子廢

魏其數爭不能得魏其謝病屏居田南山之下數月諸

賓客辯士說之莫能來梁人高遂乃說魏其曰能富貴

將軍者上也能親將軍者太后也今將軍傅太子太子

廢而不能爭爭不能得又弗能死自引謝病擁趙女屏

間處

上音閉下昌汝反

而不朝相提而論是自明揚主上之過

有如兩宮螫將軍

兩宮太子景帝也

則妻子母類矣魏其侯然

之乃遂起朝請如故桃侯免相竇太后數言魏其侯孝
景帝曰太后豈以為臣有愛不相魏其魏其者沾沾自
喜耳多易難以為相持重遂不用用建陵侯衛綰為丞
相

武安侯田蚡者孝景后同母弟也生長陵魏其已為大

將軍後方盛蚡為諸郎未貴往來侍酒魏其跪起如子
姪及孝景晚節蚡益貴幸為太中大夫蚡辯有口學槃
孟諸書王太后賢之孝景崩即日太子立稱制所鎮撫
多有田蚡賓客計策蚡弟田勝皆以太后弟孝景後三
年封蚡為武安侯勝為周陽侯

絳州聞喜縣東二十里周陽故城也

武安

侯新欲用事為相卑下賓客進名士家居者貴之欲以
傾魏其諸將相建元元年丞相綰病免上議置丞相太
尉籍福說武安侯曰魏其貴久矣天下士素歸之今將

軍初興未如魏其即上以將軍為丞相必讓魏其魏其為丞相將軍必為太尉太尉丞相尊等耳又有讓賢名武安侯乃微言太后風上於是乃以魏其侯為丞相武安侯為太尉籍福賀魏其侯因弔曰君侯資性喜善疾惡方今善人譽君侯故至丞相然君侯且疾惡惡人衆亦且毀君侯君侯能蕪容則幸久不能今以毀去矣魏其不聽魏其武安俱好儒術推轂趙綰為御史大夫王臧為郎中令迎魯申公欲設明堂令列侯就國除關以

禮為服制以興太平舉適諸竇宗室母節行者除其屬
籍時諸外家為列侯列侯多尚公主皆不欲就國以故
毀日至竇太后太后好黃老之言而魏其武安趙綰王
臧等務隆推儒術賤道家言是以竇太后滋不說魏其
等及建元二年御史大夫趙綰請無奏事東宮竇太后
大怒乃罷逐趙綰王臧等而免丞相太尉以柏至伯許
昌為丞相武彊侯莊青翟為御史大夫魏其武安由此
以侯家居武安侯雖不任職以王太后故親幸數言事

多效天下吏士趨勢利者皆去魏其歸武安武安日益橫建元六年竇太后崩丞相昌御史大夫青翟坐喪事不辨免以武安侯蚡為丞相以大司農韓安國為御史大夫天下士郡國諸侯愈益拊武安武安者貌侵生貴甚又以為諸侯王多長上初即位富於春秋蚡以肺腑

為京師相

顏師古曰舊解云肺腑如肝肺之相附着也一說肺辟木札也喻其輕薄附着大材按顏

此說並是踈謬又改肺為附就其義重謬矣八十一難云寸口者脉之大會于太陰之動脉也呂廣云太陰者肺之脉也肺為諸藏之主通陰陽故十二經脉皆會乎太陰所以決吉凶者十二經有病皆寸口知其何經之

動浮沉濤滑春秋逆順知其死生顧野王云肺腑腹心也果說田蚡為相若人之肺如陰陽逆順又為帝之腹心親戚也非痛折節以禮詘之天下不肅當是時丞相入奏

事坐語移日所言皆聽薦人或起家至二千石權移主上上乃曰君除吏已盡未吾亦欲除吏嘗請考工地益宅上怒曰君何不遂取武庫是後乃退嘗召客飲坐其兄蓋侯南鄉自坐東鄉以為漢相尊不可以兄故私橈武安由此滋驕治宅甲諸第田園極膏腴而市買郡縣器物相屬於道前堂羅鐘鼓立曲旃後房婦女以百數

諸侯奉金玉狗馬玩好不可勝數魏其失竇太后益疏不用無勢諸客稍稍自引而怠傲唯灌將軍獨不失故魏其日默默不得志而獨厚遇灌將軍

灌將軍夫者潁陰人也夫父張孟嘗為潁陰侯嬰舍人得幸因進之至二千石故蒙灌氏姓為灌孟吳楚反時潁陰侯灌何為將軍屬太尉請灌孟為校尉夫以千人與父俱灌孟年老潁陰侯彊請之鬱鬱不得意故戰常陷堅遂死吳軍中軍法父子俱從軍有死事得與喪歸

灌夫不肯隨喪歸奮曰願取吳王若將軍頭以報父之仇於是灌夫被甲持戟募軍中壯士所善願從者數十人及出壁門莫敢前獨二人及從奴十數騎馳入吳軍至吳將麾下

謂大將之旗

所殺傷數十人不得前復馳還走

入漢壁皆亡其奴獨與一騎歸夫身中大創十餘適有萬金良藥故得無死夫創少瘳又復請將軍曰吾益知吳壁中曲折請復往將軍壯義之恐亡夫乃言太尉太尉乃固止之吳已破灌夫以此名聞天下潁陰侯言之

上上以夫為中郎將數月坐法去後家居長安中
諸公莫弗稱之孝景時至代相孝景崩今上初即位以
為淮陽天下交勁兵處故徙夫為淮陽太守建元元年
入為太僕二年夫與長樂衛尉竇甫飲輕重不得夫醉
搏甫甫竇太后昆弟也上恐太后誅夫徙為燕相數歲
坐法去官家居長安灌夫為人剛直使酒不好面諛貴
戚諸有勢在己之右不欲加禮必陵之諸士在己之左
愈賁賤尤益敬與鈞桐人廣衆薦寵下輩士亦以此多

之夫不喜文學好任俠已然諾諸所與交通無非豪傑
大猾家累數千萬食客日數十百人陂池田園宗族賓
客為權利橫於潁川潁川兒乃歌之曰潁水清灌氏寧
潁水濁灌氏族灌氏家居雖富然失勢卿相待中賓客
益衰及魏其侯失勢亦欲倚灌夫引繩批根生平慕之
後棄之者灌夫亦倚魏其而通列侯宗室為名高兩人
相為引重其游如父子然相得驩甚無厭恨相知晚也
灌夫有服過丞相丞相從容曰吾欲與仲孺過魏其侯

會仲孺有服灌夫曰將軍乃肯幸臨况魏其侯夫安敢以服為解請語魏其侯帳具將軍旦日蚤臨武安許諾灌夫具語魏其侯如所謂武安侯魏其與其夫人益市牛酒夜灑掃早帳具至旦平明令門下候伺至日中丞相不來魏其謂灌夫曰丞相豈忘之哉灌夫不懌曰夫以服請宜往乃駕自往迎丞相丞相特前戲許灌夫殊無意往及夫至門丞相尚卧於是夫入見曰將軍昨日幸許過魏其魏其夫妻治具自旦至今未敢嘗食武安

鄂謝曰吾昨日醉忽忘與仲孺言乃駕往又徐行灌夫
愈益怒及飲酒酣夫起舞屬丞相丞相不起夫從坐上
語侵之魏其乃扶灌夫去謝丞相丞相卒飲至夜極驩
而去丞相嘗使籍福請魏其城南田魏其大望曰老僕
雖棄將軍雖貴寧可以勢奪乎不許灌夫聞怒罵籍福
籍福惡兩人有郤乃謾自好謝丞相曰魏其老且死易
忍且待之已而武安聞魏其灌夫實怒不予田亦怒曰
魏其子嘗殺人蚡活之蚡事魏其無所不可何愛數頃

田且灌夫何與也吾不敢復求田武安由此大怒灌夫
魏其元光四年春丞相言灌夫家在潁川橫甚民苦之
請案上曰此丞相事何請灌夫亦持丞相陰事為姦利
受淮南王金與語言賓客居間遂止俱解夏丞相取燕
王女為夫人有太后詔召列侯宗室皆往賀魏其侯過
灌夫欲與俱夫謝曰夫數以酒失得過丞相丞相今者
又與夫有却魏其曰事已解彊與俱飲酒酣武安起為
壽坐皆避席伏已魏其侯為壽獨故人避席耳餘半膝

席灌夫不悅起行酒至武安武安膝席曰不能滿觴夫
怒因嘻笑曰將軍貴人也屬之時武安不肯行酒次至
臨汝侯臨汝侯方與程不識耳語又不避席夫無所發
怒乃罵臨汝侯曰生平毀程不識不直一錢今日長者
為壽乃效女兒咕躡耳語武安謂灌夫曰程李俱東西
宮衛尉今衆辱程將軍仲孺獨不為李將軍地乎灌夫曰
今日斬頭陷胷何知程李乎坐乃起更衣稍稍去魏其
侯去麾灌夫出武安遂怒曰此吾驕灌夫罪乃令騎留

灌夫灌夫欲出不得籍福起為謝案灌夫項令謝夫愈怒不肯謝武安乃麾騎縛夫置傳舍召長史曰今日召宗室有詔劾灌夫罵坐不敬繫居室遂按其前事遣吏分曹逐捕諸灌氏支屬皆得棄市罪魏其侯大媿為資使賓客請莫能解武安吏皆為耳目諸灌氏皆亡匿夫繫遂不得告言武安陰事魏其銳身為救灌夫夫人諫魏其曰灌將軍得罪丞相與太后家忤寧可救邪魏其侯曰侯自我得之自我捐之無所恨且終不令灌仲孺

獨死嬰獨生乃匿其家竊出上書立召入具言灌夫醉飽事不足誅上然之賜魏其食曰東朝廷辯之魏其之東朝盛推灌夫之善言其醉飽得過乃丞相以他事誣罪之武安又盛毀灌夫所為橫恣罪逆不道魏其度不可奈何因言丞相短武安曰天下幸而安樂無事蚡得為肺腑所好音樂狗馬田宅蚡所愛倡優巧匠之屬不如魏其灌夫日夜招聚天下豪桀壯士與論議腹誅而心謗不仰視天而俯畫地辟俛兩宮間幸天下有變而

欲有大功臣乃不如魏其等所為於是上問朝臣兩人孰是御史大夫韓安國曰魏其言灌夫父死事身荷戟馳入不測之吳軍身被數十創名冠三軍此天下壯士非有大惡爭杯酒不足引他過以誅也魏其言是也丞相亦言灌夫通姦猾侵細民家累巨萬橫恣潁川凌轢宗室侵犯骨肉此所謂枝大於本脰大於股不折必披

鋪被反披
分折也

丞相言亦是唯明主裁之主爵都尉汲黯是

魏其內史鄭當時是魏其後不敢堅對餘皆莫敢對上

怒內史曰公平生數言魏其武安長短今日廷論局趣

效轅下駒

應劭云駒馬加着轅局趣纖小之貌按應說為長也

吾并斬若屬矣即

罷起入上食太后太后亦已使人候伺具以告太后太

后怒不食曰今我在也而人皆籍吾弟令我百歲後皆

魚肉之矣且帝寧能為石人邪

顏師古云言徒有人耳不知好惡按今俗云人

不辨事罵云机机若木人也

此時帝在即錄錄設百歲後是屬寧有

可信者乎上謝曰俱宗室外家

嬰景帝從舅甥太后同母弟

故廷辯

之不然此一獄吏所決耳是時郎中令石建為上分別

言兩人事武安已罷朝出止車門召韓御史大夫載怒
曰與長孺共一老秃翁何為首鼠兩端韓御史良久謂
丞相曰君何不自喜夫魏其毀君君當免冠解印綬歸
曰臣以肺腑幸得待罪固非其任魏其言皆是如此上
必多君有讓不廢君魏其必內愧杜門齟舌自殺今人
毀君君亦毀人譬如賈豎女子爭言何其無大體也武
安謝罪曰爭時急不知出此於是上使御史簿責魏其
所言灌夫頗不讎

讎音市周反對也言簿責魏其所言
灌夫實順川事故魏其不對為欺謾

者欺謾劾繫都司空

如淳云律司空主水及罪人

孝景時魏其常受

遺詔曰事有不便以便宜論上及繫灌夫罪至族事曰

急諸公莫敢復明言於上魏其乃使昆弟子上書言之

幸得復召見書奏上而案尚書大行無遺詔

天子崩曰大行也按

尚書之中景帝崩時無遺詔賜魏其也百官表云諸受尚書事也

詔書獨藏魏其家家

丞封乃劾魏其矯先帝詔罪當棄市五年十月

漢書云元光四

年冬魏其侯嬰有罪棄市春三月乙卯丞相蚡薨按五年者誤也

悉論灌夫及家屬魏

其良久乃聞聞即患病不食欲死或聞上無意殺魏

其魏其復食治病議定不死矣乃有蜚語為惡言聞上

故以十二月晦論棄市渭城

故咸陽

其春武安侯病

其春即四

年春也元光四年十月灌夫弃市十二月未魏其弃市至三月乙卯田蚡薨則三人死同在一年明矣漢以十月為歲首故也秦楚之際者云十一月十二月端月二月三月至九為終周建子為正月十一月為正月十二月為二月正月為三月二月為四月至十月為歲終漢初至武帝太初以前並依秦法以後改用夏正月至今不改然夫子作春秋依夏正

專呼服謝罪使巫視鬼者視之見魏其

灌夫共守欲殺之竟死子恬嗣元朔三年武安侯坐衣

襜褕

爾雅云今蔽前謂之襜郭璞云蔽膝也說文字林並謂之短衣

入宮不敬淮南王

安謀反覺治正前朝武安侯為太尉時迎王至霸上謂王曰上未有太子大王最賢高祖孫即宮車晏駕非大王立當誰哉淮南王大喜厚遺金財物上自魏其時不直武安特為太后故耳及聞淮南王金事上曰使武安侯在者族矣

太史公曰魏其武安侯皆以外戚重灌夫用一時決策而名顯魏其之舉以吳楚武安之貴在日月之際然魏其誠不知時變灌夫無術而不遜兩人相翼乃成禍亂武

安負貴而好權杯酒責望陷彼兩賢嗚呼哀哉遷怒及人命亦不延衆庶不載竟被惡言嗚呼哀哉禍所從來矣

史記正義卷一百七

欽定四庫全書

史記正義卷一百八

唐 張守節 撰

韓長孺列傳第四十八

史記一百八

御史大夫韓安國者梁城安人也

括地志云成安故城在汝州梁縣東二十

三里括地志云成安屬潁川郡陳留

郡又有成安縣亦屬梁未知孰是也

後徙睢陽今宋州宋城

嘗受韓子雜家說於騶田生所事梁孝王為中大夫吳

楚反時孝王使安國及張羽為將扞吳兵於東界張羽

力戰安國持重以故吳不能過梁吳楚已破安國張羽
名由此顯梁孝王景帝母弟竇太后愛之令得自請置
相二千石出入游戲僭於天子天子聞之心弗善也太
后知帝不善乃怒梁使者弗見案責王所為韓安國為
梁使見大長公主

如淳云景
帝妹也

而泣曰何梁王為人子之

孝為人臣之忠而太后曾弗省也夫前日吳楚齊趙七
國反時自關以東皆合從西鄉惟梁最親為艱難梁王
念太后帝在中

謂關中也又云京
師在天下之中

而諸侯擾亂一言泣

數行下跪送臣等六人將兵擊郤吳楚吳楚以故兵不敢西而卒破亡梁王之力也今太后以小節苛禮責望梁王梁王父兄皆帝王所見者大故出稱蹕入言警車旗皆所賜也即欲以侘鄙縣驅馳國中以夸諸侯令天下盡知太后帝愛之也今梁使來輒案責之梁王恐日夜涕泣思慕不知所為何梁王之為子孝為臣忠而太后弗恤也大長公主具以告太后太后喜曰為言之帝言之帝心乃解而免冠謝太后曰兄弟不能相教乃

為太后遺憂悉見梁使厚賜之其後梁王益親驩太后
長公主更賜安國可直千餘金名由此顯結於漢其後
安國坐法抵罪蒙獄吏田甲辱安國安國曰死灰獨不
復然乎田甲曰然即溺之居無何梁內史缺漢使使者
拜安國為梁內史起徒中為二千石田甲亡走安國曰
甲不就官我滅而宗甲因肉袒謝安國笑曰可溺矣公
等成與治乎卒善遇之梁內史之缺也孝王新得齊人
公孫詭說之欲請以為內史竇太后聞乃詔王以安國

為內史公孫詭羊勝說孝王求為帝太子及益地事恐
漢大臣不聽乃陰使人刺漢用事謀臣及殺故吳相索
盜景帝遂聞詭勝等計畫乃遣使捕詭勝必得漢使十
輩至梁相以下舉國大索月餘不得內史安國聞詭勝
匿孝王所安國入見王而泣曰主辱臣死大王無良臣
故事紛紛至此今詭勝不得請辭賜死王曰何至此安
國泣數行下曰大王自度於皇帝孰與太上皇之與高
皇帝及皇帝之與臨江王親孝王曰弗如也安國曰夫

太上臨江親父子之間然而高帝曰提三尺劍取天下者朕也故太上皇終不得制事居于櫟陽臨江王適長太子也以一言過廢王臨江用宮垣事卒自殺中尉府何者治天下終不以私亂公語曰雖有親父安知其不為虎雖有親兄安知其不為狼今大王列在諸侯悅一邪臣浮說犯上禁撓明法天子以太后故不忍致法於王太后日夜涕泣幸大王自改而大王終不覺寤有如太后宮車即晏駕大王尚誰攀乎語未卒孝王泣數行

下謝安國曰吾今出詭勝詭勝自殺漢使還報梁事皆得釋安國之力也於是景帝太后益重安國孝王卒共王即位安國坐法失官居家建元中武安侯田蚡為漢太尉親貴用事安國以五百金物遺蚡蚡言安國太后天子亦素聞其賢即召以為北地都尉遷為大司農閩越東越相攻安國及大行王恢將兵未至越越殺其王降漢兵亦罷建元六年武安侯為丞相安國為御史大夫匈奴來請和親天子下議大行王恢燕人也數為邊

吏習知胡事議曰漢與匈奴和親率不過數歲即復倍約不如勿許興兵擊之安國曰千里而戰兵不獲利今匈奴負戎馬之足懷禽獸之心遷徙鳥舉難得而制也得其地不足以為廣有其衆不足以為彊自上古不屬為人漢數千里爭利則人馬罷虜以全制其敝且彊弩之極矢不能穿魯縞衝風之末力不能漂鴻毛非初不勁末力衰也擊之不便不如和親羣臣議者多附安國於是上許和親其明年則元光元年鴈門馬邑豪驍翁

壹因大行王恢言上曰匈奴初和親親信邊可誘以利
陰使聶翁壹為間亡入匈奴謂單于曰吾能斬馬邑令
丞吏以城降財物可盡得單于愛信之以為然許聶翁
壹聶翁壹乃還詐斬死罪囚縣其頭馬邑城示單于使
者為信曰馬邑長吏已死可急來於是單于穿塞將十
餘萬騎入武州塞當是時漢伏兵車騎材官三十餘萬
匿馬邑旁谷中衛尉李廣為驍騎將軍太僕公孫賀為
輕車將軍

司馬續漢書云
輕車古之戰車

大行王恢為將屯將軍

李奇
云監

諸太中大夫李息為材官將軍臣瓚云材官騎射之官御史大

夫韓安國為護軍將軍諸將皆屬護軍約單于入馬邑

而漢兵縱發王恢李息李廣別從代王擊其輜重

釋名云輜

厠也所載木於是單于入漢長城武州塞未至馬邑百

服難厠其中

餘里行掠鹵徒見畜牧於野不見一人單于怪之攻烽

燧得武州尉史欲刺問尉史尉史曰漢兵數十萬伏馬

邑下單于顧謂左右曰幾為漢所賣

幾音祈

乃引兵還出

塞曰吾得尉史乃天也命尉史為天王塞下傳言單于

已引去漢兵追至塞度弗及即罷王恢等兵三萬聞單于不與漢合度往擊輜重必與單于精兵戰漢兵勢必敗則以便宜罷兵皆無功天子怒王恢不出擊單于輜重擅引兵罷也恢曰始約虜入馬邑城兵與單于接而臣擊其輜重可得利今單于聞不至而還臣以三萬人衆不敵裊取辱耳臣固知還而斬然得完陛下士三萬人於是下恢廷尉廷尉當恢逗撓當斬恢私行千金丞相蚡蚡不敢言上而言於太后曰王恢首造馬邑事今

不成而誅恢是為匈奴報仇也上朝太后太后以丞相
言告上上曰首為馬邑事者恢也故發天下兵數十萬
從其言為此且縱單于不可得恢所部擊其輜重猶頗
可得慰士大夫心今不誅恢無以謝天下於是恢聞
之乃自殺安國為人大略智足以當世取舍而出於
忠厚焉貪嗜於財所推舉皆廉士賢於己者也於梁舉
壺遂臧固郅他皆天下名士士亦以此稱慕之唯天子
以為國器安國為御史大夫四歲餘丞相田蚡死安國

行丞相事奉引墮車蹇天子議置相欲用安國使使視之蹇甚乃更以平棘侯薛澤為丞相安國病免數月蹇愈上復以安國為中尉歲餘徙為衛尉車騎將軍衛青擊匈奴出上谷破胡龍城將軍李廣為匈奴所得復失之公孫敖大亡卒皆當斬贖為庶人明年匈奴大入邊殺遼西太守及入鴈門所殺略數千人車騎將軍衛青擊之出鴈門衛尉安國為材官將軍屯於漁陽

幽州縣安

國捕生虜言匈奴遠去即上書言方田作時請且罷軍

屯罷軍屯月餘匈奴大入上谷漁陽安國壁乃有七百餘人出與戰不勝復入壁匈奴虜略千餘人及畜產而去天子聞之怒使使責讓安國徙安國益東屯右北平

幽州漁陽縣東南七十七里北平城即漢古北平也

是時匈奴虜言當入東方

安國始為御史大夫及護軍後稍斥疏下遷而新幸壯將軍衛青等有功益貴安國既疏遠默默也將屯又為匈奴所欺失亡多甚自愧幸得罷歸乃益東徙屯意忽忽不樂數月病歐血死安國以元朔二年卒

太史公曰余與壺遂定律厯觀韓長孺之義壺遂之深
中隱厚世之言梁多長者不虛哉壺遂官至詹事天子
方倚以為漢相會遂卒不然壺遂之內廉行脩斯鞠躬
君子也

史記正義卷一百八

欽定四庫全書

史記正義卷一百九

唐 張守節 撰

李將軍列傳第四十九

史記一百九

李將軍廣者隴西成紀人也

成紀秦州縣

其先曰李信秦時

為將逐得燕太子丹者也故槐里徙成紀廣家世世受

射孝文帝十四年匈奴大入蕭關而廣以良家子從軍

擊胡用善騎射殺首虜多為漢中郎廣從弟李蔡亦為

郎皆為武騎常侍秩八百石嘗從行有所衝陷折關及
格猛獸而文帝曰惜乎子不遇時如令子當高帝時萬
戶侯豈足道哉及孝景初立廣為隴西都尉徙為騎郎
將吳楚軍時廣為驍騎都尉從太尉亞夫擊吳楚軍取
旗顯功名昌邑下以梁王授廣將軍印還賞不行徙為
上谷太守匈奴日以合戰典屬國公孫昆邪為上泣曰
李廣才氣天下無雙自負其能數與虜敵戰恐亡之於是乃
徙為上郡太守後廣轉為邊郡太守徙上郡嘗為隴西北

地鴈門代郡雲中太守皆以力戰為名匈奴大入上郡
天子使中貴人從廣勒習兵擊匈奴中貴人將騎數十
縱見匈奴三人與戰三人還射

射音石還謂轉也

傷中貴人殺

其騎且盡中貴人走廣廣曰是必射雕者也廣乃遂從
百騎往馳三人三人亡馬步行行數十里廣令其騎張
左右翼而廣身自射彼三人者殺其二人生得一人果
匈奴射雕者也已縛之上馬望匈奴有數千騎見廣以
為誘騎皆驚上山陳廣之百騎皆大恐欲馳還走廣曰

吾去大軍數十里今如此以百騎走匈奴追射我立盡
今我留匈奴必以我為大將軍誘之必不敢擊我廣令
諸騎曰前前未到匈奴陳二里所止令曰皆下馬解鞍
其騎曰虜多且近即有急奈何廣曰彼虜以我為走今
皆解鞍以示不走用堅其意於是胡騎遂不敢擊有白
馬將其將乘白馬而將監護也出護其兵李廣上馬與十餘騎犇射
殺胡白馬將而復還至其騎中解鞍令士皆縱馬卧是
時會暮胡兵終怪之不敢擊夜半時胡兵亦以為漢有

伏軍於旁欲夜取之胡皆引兵而去平旦李廣乃歸其
大軍大軍不知廣所之故弗從居久之孝景崩武帝立
左右以為廣名將也於是廣以上郡太守為未央衛尉
而程不識亦為長樂衛尉程不識故與李廣俱以邊太
守將軍屯及出擊胡而廣行無部位行陣就善水草屯
舍止人人自便不擊刁斗以自衛莫府省約文書籍事
然亦遠斥候未嘗遇害程不識正部曲行伍營陳擊刁
斗士吏治軍簿至明軍不得休息然亦未嘗遇害不識

曰李廣軍極簡易然虜卒犯之無以禁也而其士卒亦
佚樂咸樂為之死我軍雖煩擾然虜亦不得犯我是時
漠邊郡李廣程不識皆為名將然匈奴畏李廣之略士
卒亦多樂從李廣而苦程不識程不識孝景時以數直
諫為太中大夫為人廉謹於文法後漢以馬邑城誘單
于使大軍伏馬邑旁谷而廣為驍騎將軍領屬護軍將
軍是時單于覺之去漢軍皆無功其後四歲廣以衛尉
為將軍出鴈門擊匈奴匈奴兵多破敗廣軍生得廣單

予素聞廣賢令曰得李廣必生致之胡騎得廣廣時傷
病置廣兩馬間絡而盛卧廣行十餘里廣佯死晚其旁
有一胡兒騎善馬廣暫騰而上胡兒馬因推墮兒取其
弓鞭馬南馳數十里復得其餘軍因引而入塞匈奴捕
者騎數百追之廣行取胡兒弓射殺追騎以故得脫於
是至漢漢下廣吏吏當廣所失亡多為虜所生得當斬
贖為庶人頃之家居數歲廣家與故潁陰侯孫屏野居
藍田南山中射獵嘗夜從一騎出從人田間飲還至霸

陵亭霸陵尉醉呵止廣廣騎曰故李將軍尉曰今將軍
尚不得夜行何乃故也止廣宿亭下居無何匈奴入殺
遼西太守敗韓將軍韓將軍後徙右北平於是天子乃
召拜廣為右北平太守廣即請霸陵尉與俱至軍而斬
之廣居右北平匈奴聞之號曰漢之飛將軍避之數歲
不敢入右北平廣出獵見草中石以為虎而射之中石
沒鏃視之石也因復更射之終不能復入石矣廣所居
郡聞有虎嘗自射之及居右北平射虎虎騰傷廣廣亦

竟射殺之廣廉得賞賜輒分其麾下飲食與士共之終
廣之身為二千石四十餘年家無餘財終不言家產事
廣為人長猿臂其善射亦天性也雖其子孫他人學者
莫能及廣廣訥口少言與人居則畫地為軍陳射闊狹
以飲

飲音於
禁反

專以射為戲竟死廣之將兵乏絕之處見

水士卒不盡飲廣不近水士卒不盡食廣不嘗食寬緩
不苛士以此愛樂為用其射見敵急非在數十步之內
度不中不發發即應弦而倒用此其將兵數困辱其射

猛獸亦為所傷云居頃之石建卒於是上召廣代建為
郎中令元朔六年廣復為後將軍從大將軍軍出定襄
擊匈奴諸將多中首虜率以功為侯者而廣軍無功後
三歲廣以郎中令將四千騎出右北平博望侯張騫將
萬騎與廣俱異道行可數百里匈奴左賢王將四萬騎
圍廣廣軍士皆恐廣乃使其子敢往馳之敢獨與數十
騎馳直貫胡騎出其左右而還告廣曰胡虜易與耳軍
士乃安廣為圍陳外嚮胡急擊之矢下如雨漢兵死者

過半漢矢且盡廣乃令士持滿毋發而廣身自以大黃射其裨將殺數人胡虜益解會日暮吏士皆無人色而廣意氣自如益治軍軍中自是服其勇也明日復力戰而博望侯軍亦至匈奴軍乃解去漢軍罷弗能追是時廣軍幾沒罷歸漢法博望侯留遲後期當死贖為庶人廣軍功自如無賞初廣之從弟李蔡與廣俱事孝文帝景帝時蔡積功勞至二千石孝武帝時至代相以元朔五年為輕車將軍從大將軍擊右賢王有功中率封為

樂安侯元狩二年中代公孫弘為丞相蔡為人在下中
名聲出廣下甚遠然廣不得爵邑官不過九卿而蔡為
列侯位至三公諸廣之軍吏及士卒或取封侯廣嘗與
望氣王朔燕語曰自漢擊匈奴而廣未嘗不在其中而
諸部校尉以下才能不及中人然以擊胡軍功取侯者
數十人而廣不為後人然無尺寸之功以得封邑者何
也豈吾相不當侯邪且固命也朔曰將軍自念豈嘗有
所恨乎廣曰吾嘗為隴西守羌嘗反吾誘而降降者八

百餘人吾詐而同日殺之至今大恨獨此耳朔曰禍莫大於殺已降此乃將軍所以不得侯者也後二歲大將軍驃騎將軍大出擊匈奴廣數自請行天子以為老弗許良久乃許之以為前將軍是歲元狩四年也廣既從大將軍青擊匈奴既出塞青捕虜知單于所居乃自以精兵走之而令廣并於右將軍軍出東道東道少回遠而大軍行水草少其勢不屯行廣自請曰臣部為前將軍今大將軍乃徙令臣出東道且臣結髮而與匈奴戰

今乃一得當單于臣願居前先死單于大將軍青亦陰受上誠以為李廣老數奇毋令當單于恐不得所欲而是時公孫敖新失侯為中將軍從大將軍大將軍亦欲使敖與俱當單于故徙前將軍廣廣時知之固自辭於大將軍大將軍不聽令長史封書與廣之莫府曰急詣部如書

令廣如其文牒急引兵徙東道也

廣不謝大將軍而起行意甚

愠怒而就部引兵與右將軍食其合軍出東道軍亡導或失道後大將軍大將軍與單于接戰單于遁走弗能

得而還南絕幕

絕度也南
歸度砂幕

遇前將軍右將軍廣已見大

將軍還入軍大將軍使長史持糒醪遺廣因問廣食其

失道狀青欲上書報天子軍曲折

言委曲而行迴折使
軍後大將軍也

廣未對大將軍使長史急責廣之幕府對簿廣曰諸校

尉無罪乃我自失道吾今自上簿至莫府廣謂其麾下

曰廣結髮與匈奴大小七十餘戰今幸從大將軍出接

單于兵而大將軍又從廣部行回遠而又迷失道豈非

天哉且廣年六十餘矣終不能復對刀筆之吏遂引刀

自頸廣軍士大夫一軍皆哭百姓聞之知與不知無老壯皆為垂涕而右將軍獨下吏當死贖為庶人廣子三人曰當戶椒敢為郎天子與韓嫣戲嫣少不遜當戶擊嫣嫣走於是天子以為勇當戶早死拜椒為代郡太守皆先廣死當戶有遺腹子名陵廣死軍時敢從驃騎將軍廣死明年李蔡以丞相坐侵孝景園塲地漢書云詔賜冢地陽侯當得二十畝蔡蓋取三頃願賣得四十餘萬又蓋取神道外塲地一畝蓋其中當下獄自殺當下吏治蔡亦自殺不對獄國除李敢以校尉從驃騎將軍擊

胡左賢王力戰奪左賢王鼓旗斬首多賜爵關內侯食邑二百戶代廣為郎中令頃之怨大將軍青之恨其父乃擊傷大將軍大將軍匿諱之居無何敢從上雍至甘泉宮獵驃騎將軍去病與青有親射殺敢去病時方貴幸上諱云鹿觸殺之居歲餘去病死而敢有女為太子中人愛幸敢男禹有寵於太子然好利李氏陵遲衰微矣李陵既壯選為建章監監諸騎善射愛士卒天子以為李氏世將而使將八百騎嘗深入匈奴二千餘里過

居延

括地志云居延海在甘州張掖縣東北六十四里地理志云居延澤古文以為流沙甘州在京西北

二千四百六十里

視地形無所見虜而還拜為騎都尉將丹陽

楚人五千人教射酒泉張掖以屯衛胡數歲天漢二年

秋貳師將軍李廣利將三萬騎擊匈奴右賢王祁連天

山

括地志云祁連山在甘州張掖縣西南二百里天山一名白山今名初羅漫山在伊吾縣北百二十里伊

州在京西北四百一十六里

而使陵將其射士步兵五千人出居

延北可千餘里欲以分匈奴兵毋令專走貳師也陵既

至期還而單于以兵八萬圍擊陵軍陵軍五千人兵矢

既盡士死者過半而所殺傷匈奴亦萬餘人且引且戰連闢八日還未到居延百餘里匈奴遮狹絕道陵食乏而救兵不到虜急擊招降陵陵曰無面目報陛下遂降匈奴其兵盡沒餘亡散得歸漢者四百餘人單于既得陵素聞其家聲及戰又壯乃以其女妻陵而貴之漢聞族陵母妻子自是之後李氏名敗而隴西之士居門下者皆用為恥焉

太史公曰傳曰其身正不令而行其身不正雖令不從

其李將軍之謂也余睹李將軍悛悛如鄙人口不能道
辭及死之日天下知與不知皆為盡哀彼其忠實心誠
信於士大夫也諺曰桃李不言下自成蹊此言雖小可
以論大也



史記正義卷一百九

欽定四庫全書

史部

史記正義卷一百十至一百十五

詳校官編修臣李如筠

欽定四庫全書

史記正義卷一百十

唐 張守節 撰

匈奴列傳第五十

此卷或有本次平津侯後第五十二
今第五十者先生舊本如此劉伯莊

音亦然若言諸傳而次四夷
則司馬汲鄭不合在後也

史記一百十

匈奴其先祖夏后氏之苗裔也曰淳維唐虞以上有山

戎

左傳莊三十年齊人伐山戎杜預云山戎北戎無終
三名也括地志云幽州漁陽縣本北戎無終子國

獫狁葷粥居于北蠻隨畜牧而轉移其畜之所多則馬

牛羊其奇畜則橐駝

畜許又反

驢羸

羸音力戈反

馱駃騠騊駼驪驎

逐水草遷徙毋城郭常處耕田之業然亦各有分地毋

文書以言語為約束兒能騎羊引弓射鳥鼠少長則射

狐兔用為食士力能彎弓盡為甲騎其俗寬則隨畜因

射獵禽獸為生業急則人習戰攻以侵伐其天性也其

長兵則弓矢短兵則刀鉞利則進不利則退不羞遁走

苟利所在不知禮義自君王以下咸食畜肉衣其皮革

被旃裘壯者食肥美老者食其餘貴壯健賤老弱父死

妻其後母兄弟死皆取其妻妻之其俗有名不諱而無

姓字夏道衰而公劉失其稷官

周本紀云不窟失其官此云公劉未詳也

變

于西戎邑于豳其後三百有餘歲戎狄攻大王亶父亶父亡走歧下而豳人悉從亶父而邑焉作周其後百有餘歲周西伯昌伐畎夷氏後十有餘年武王伐紂而營維維邑復居于鄴鄴放逐戎夷涇洛之北以時入貢命曰荒服其後二百有餘年周道衰而穆王伐犬戎得四白狼四白鹿以歸自是之後荒服不至於是周遂作甫刑

之辟穆王之後二百有餘年周幽王用寵姬褒姒之故

與申侯有郤

故申城在鄧州南陽縣北三十里周宣王舅所封

申侯怒而與犬

戎共攻殺周幽王于驪山之下遂取周之焦穫

括地志云焦穫

亦名剗口亦曰剗中在雍州涇陽縣北城十數里周有焦穫也

而居于涇渭之間侵暴

中國秦襄公救周於是周平王去鄠郾而東徙雒邑當

是之時秦襄公伐戎至岐

今岐州高誘云秦襄公救周有功受周故地鄠鎬列為諸

也始列為諸侯是後六十有五年而山戎越燕而伐齊

齊釐公與戰于齊郊其後四十四年而山戎伐燕燕告

急于齊齊桓公北伐山戎走其後二十有餘年而
戎狄至洛邑伐周襄王襄王奔于鄭之汜邑初周襄王
欲伐鄭欲娶戎狄女為后與戎狄兵共伐鄭已而黜狄
后狄后怨而襄王後母曰惠后有子子帶欲立之於是
惠后與狄后子帶為內應開戎狄戎狄以故得入破逐
周襄王而立子帶為天子於是戎狄或居于陸渾東至
於衛侵盜暴虐中國疾之故詩人歌之曰戎狄是膺薄
伐獫狁至於太原出與彭彭城彼朔方

言獫狁既去北
方安靜乃築城

也守之周襄王既居外四年乃使使告急于晉晉文公初

立欲修霸業乃興師伐逐戎翟誅子帶迎內周襄王居

于維邑當是之時秦晉為疆國晉文公攘戎翟居于河

西圖洛之間

括地志云白土故城在鹽州白地東北三百九十里又云近延州綏州銀州本春秋

時白狄所居七國屬魏後入秦秦置三十六郡洛漆沮也

號曰赤翟白翟

括地志云潞州本赤

狄地延銀綏三州白翟地按文言圖洛之間號赤狄未詳

秦穆公得由余西戎八國

服於秦故自隴以西有繇諸

括地志云隴諸城秦州秦嶺縣北五十六里漢隴諸道

屬天水郡

緄戎

上音昆字當作混顏師古云混云夷也韋昭云春秋以為犬戎

翟獯之戎

括地

志云 輶道故城在渭州襄武縣東南三十里古之輶戎邑漢輶道屬天水郡 岐梁山涇漆之北

有義渠

括地志云寧州慶州西戎即劉向邑城時為義渠戎國秦為北地郡也

大荔

括地志同州馮

邠縣及朝邑縣本漢臨晉縣地古大荔戎國今朝邑縣東三十步故三城即大荔三城荔力計反

烏氏

氏音

史括地志云烏氏故城在涇州安安縣東三十里周之故地後入戎秦惠王取之置烏氏縣也

胸衍之戎

括地志云鹽州古戎狄居之而胸衍戎之地秦北地郡也

而晉北有林胡

括地志云朔州春秋

時北地也如淳云即唐林也為李牧滅

樓煩之戎

括地志云嵐州樓煩胡地也風俗通云故樓煩故地

也 燕北有東胡山戎各分散居谿谷自有君長往往而聚

者百有餘戎然莫能相一自是之後百有餘年晉悼公使

魏絳和戎翟戎翟朝晉後百有餘年趙襄子踰句注而破并代以臨胡貉其後既與韓魏共滅智伯分晉地而有之則趙有代句注之北魏有河西上郡以與戎界邊其後義渠戎築城郭以自守而秦稍蠶食至於惠王遂拔義渠二十五城惠王擊魏魏盡入西河及上郡于秦秦昭王時義渠戎王與宣太后亂有二子宣太后詐而殺義渠戎王於甘泉遂起兵伐殘義渠於是秦有隴西北地上郡築長城以拒胡而趙武靈王亦變俗胡服習騎射北破林胡樓煩

築長城

括地志云趙武靈王長城在朔州善陽縣北案長城水經云百道長城北山上有長垣若顏毀

焉公奚

巨嶺東西无

自代並陰山

若地志云陰山在朔州北

極蓋趙

靈王所築也

塞外突

下至高闕為塞

地理志云朔方臨戎縣北有連山險於長城其山中斷兩峯俱

峻上俗名

而置雲中鴈門代郡其後燕有賢將秦開為

為高闕也

質於胡胡甚信之歸而襲破走東胡東胡卻千餘里與

荆軻刺秦王秦舞陽者開之孫也燕亦築長城自造陽

按上谷郡

至襄平置上谷漁陽右北平遼西遼東郡以

今媯州

拒胡當是之時冠帶戰國七而三國邊於匈奴其後趙

將李牧時匈奴不敢入趙邊後秦滅六國而始皇帝使

蒙恬將十萬之衆北擊胡悉收河南地因河為塞築四

十四縣城臨河徙適戍以充之而通直道自九原至雲

陽

括地志云勝州連谷縣本秦九原郡漢武帝更名五原雲陽雍縣秦之林光宮即漢之甘泉宮為馬又云

秦故道在慶州華池縣西四十五里

因邊山險塹谿谷

可繕者治之起臨洮至遼東萬餘里

括地志云秦隴西郡臨洮縣即今岷

州城本秦長城首起岷州西十二里延袤萬餘里東大遼水

又度河據陽山北假中

括地志云漢五原郡河月縣故城在北假中北假地名也在河北今屬勝州銀城縣漢書王莽傳云五原北假

膏壤殖

穀也

當是之時東胡彊而月氏盛

氏音支括地志云涼甘肅延沙等州

地本月

氏國

匈奴單于曰頭曼頭曼不勝秦北徙十餘年而

蒙恬死諸侯畔秦中國擾亂諸秦所徙適戍邊者皆復

去於是匈奴得寬復稍度河南與中國界於故塞單于

有太子名冒頓後有所愛閼氏生少子而單于欲廢冒

頓而立少子乃使冒頓質於月氏冒頓既質於月氏而

頭曼急擊月氏月氏欲殺冒頓冒頓盜其善馬騎之亡

歸頭曼以為壯令將萬騎冒頓乃作為鳴鏑習勒其騎

射令曰鳴鏑所射而不悉射者斬之行獵鳥獸有不射
鳴鏑所射者輒斬之已而冒頓以鳴鏑自射其善馬左
右或不敢射者冒頓立斬不射善馬者居頃之復以鳴
鏑自射其愛妻左右或頗恐不敢射冒頓又復斬之居
頃之冒頓出獵以鳴鏑射單于善馬左右皆射之於是
冒頓知其左右皆可用從其父單于頭曼獵以鳴鏑射
頭曼其左右亦皆隨鳴鏑而射殺單于頭曼遂盡誅其
後母與弟及大臣不聽從者冒頓自立為單于冒頓既

立是時東胡彊盛聞冒頓殺父自立乃使使謂冒頓欲
得頭曼時有千里馬冒頓問羣臣羣臣皆曰千里馬匈奴
寶馬也勿與冒頓曰奈何與人鄰國而愛一馬乎遂
與之千里馬居頃之東胡以為冒頓畏之乃使使謂冒
頓欲得單于一闕氏冒頓復問左右左右皆怒曰東胡無
道乃求闕氏請擊之冒頓曰奈何與人鄰國愛一女子
乎遂取所愛闕氏予東胡東胡王愈益驕西侵與匈奴
間中有棄地莫居千餘里各居其邊為甌脫

按境上斥
候之室為

也甌脫

東胡使使謂冒頓曰匈奴所與我界甌脫外棄地
匈奴非能至也吾欲有之冒頓問羣臣羣臣或曰此棄
地予之亦可勿與亦可於是冒頓大怒曰地者國之本
也奈何予之諸言予之者皆斬之冒頓上馬令國中有
後者斬遂東襲擊東胡東胡初輕冒頓不為備及冒頓
以兵至擊大破滅東胡王而虜其民人及畜產既歸西
擊走月氏南并樓煩白羊河南王侵燕代悉復收秦所
使蒙恬所奪匈奴地者與漢關故河南塞至朝那膚施

漢朝那政城在原州百泉縣西七十里屬安
定郡肅施縣秦因不改今延州肅施縣是
遂侵燕代

是時漢兵與項羽相距中國罷於兵革以故冒頓得自
彊控弦之士三十餘萬自淳維以至頭曼千有餘歲時
大時小別散分離尚矣其世傳不可得而次云然至冒
頓而匈奴最彊大盡服從北夷而南與中國為敵國其
世傳國官號乃可得而記云置左右賢王左右谷蠡王
左右大將左右大都尉左右大當戶左右骨都侯匈奴
謂賢曰屠耆故常以太子為左屠耆王自如左右賢以

下至當戶大者萬騎小者數千凡二十四長立號曰萬

騎諸大臣皆世官呼衍氏蘭氏

顏師古云呼衍即今鮮卑姓呼延者也蘭姓今

亦有其後有須卜氏

後漢書云呼衍氏須卜氏常與單于婚姻

此三姓其貴

種也諸左方王將居東方直上谷

上谷郡今鵠州也言匈奴東方南出直當

鵠州也以往者東接穢貉朝鮮右方王將居西方直上郡

上郡故城在涇州上縣東南五十里言匈奴西方南直當綏州也

以西接月氏氏羗而單

于之庭直代雲中

代郡城北狄代國秦漢代縣城也在蔚州羗胡縣北百五十里雲中故城

趙雲中城秦雲中郡在勝州榆林縣東北四十里言匈奴之南直當代雲中也

各有分地逐水

草移徙而左右賢王左右谷蠡王最為大國左右骨都

侯輔政諸二十四長亦各自置千長百長什長裨小王

相封都尉當戶且渠之屬

且子餘反顏師古云今之沮渠姓蓋本因此官

歲正

月諸長小會單于庭祠五月大會龍城登其先天地鬼

神秋馬肥大會蹕林

顏師古云蹕者遠林木而祭也鮮卑之俗自古相傳秋祭死林木者

尚豎柳枝束騎馳逐三周乃止此其遺法也

課校人畜

許又反

計其法拔刃尺

者死坐盜者沒入其家有小者軋

顏師古云軋者謂輓轢其骨節若今之厭

之厭也

大者死獄久者不過十日一國之囚不過數人而

單于朝出營拜日之始生夕拜月其坐長左而北鄉

其座

北向長者左以左為尊也

曰上戊己其送死有棺槨金銀衣裘而

無封樹喪服近幸臣妾從死者多至數千百人

漢書作數十百

人顏師古云或數十人或百人

舉事而候星月月盛壯則攻戰月虧則

退兵其攻戰斬首虜賜一卮酒而所得鹵獲因以予之

得人以為奴婢故其戰人人自為趣利善為誘兵以冒

敵故其見敵則逐利如鳥之集其困敗則瓦解雲散矣

戰而扶輿死者盡得死者家財後北服渾庾屈射丁靈

禹昆新犁之國

已上五國
在匈奴北

於是匈奴貴人大臣皆服以

冒頓單于為賢是時漢初定中國徙韓王信於代都馬
邑匈奴大攻圍馬邑韓王信降匈奴匈奴得信因引兵
南踰句注攻太原至晉陽下高帝自將兵往擊之會冬
大寒雨雪卒之墮指者十二三於是冒頓詳敗走誘漢
兵漢兵遂擊冒頓冒頓匿其精兵見其羸弱於是漢悉
兵多步兵三十二萬北逐之高帝先至平城步兵未盡
到冒頓縱精兵四十萬騎圍高帝於白登

白登臺在白
登山朔州

定襄縣東三十里定襄縣漢平城縣也

七日漢兵中外不得相救餉匈奴

騎其西方盡白馬東方盡青驪馬

鄭元云驪不純也說文云驪面頰皆白爾

雅云黑馬面白也

北方盡烏驪馬南方盡騂馬高帝乃使使問

厚遺閼氏閼氏乃謂冒頓曰兩主不相困今得漢地而單于終非能居之也且漢王亦有神單于察之冒頓與韓王信之將王黃趙利期而黃利兵又不來疑其與漢有謀亦取閼氏之言乃解圍之一角於是高帝令士皆持滿傳矢外鄉從解角直出竟與大軍合而冒頓遂引

兵而去漢亦引兵而罷使劉敬結和親之約是後韓王
信為匈奴將及趙利王黃等數倍約侵盜代雲中居無
幾何陳豨反又與韓信合謀擊代漢使樊噲往擊之復拔
代鴈門雲中郡縣不出塞是時匈奴以漢將衆往降故
冒頓常往來侵盜代地於是漢惠之高帝乃使劉敬奉
宗室女公主為單于閼氏歲奉匈奴絮繒酒米食物各
有數約為昆弟以和親冒頓乃少止後燕王盧綰反率
其黨數千人降匈奴往來苦上谷以東高祖崩孝惠呂

太后時漢初定故匈奴以驕冒頓乃為書遺高后妄言
高后欲擊之諸將曰以高帝賢武然尚困於平城於是
高后乃止復與匈奴和親至孝文帝初立復脩和親之
事其三年五月匈奴右賢王入居河南地侵盜上郡葆
塞蠻夷殺略人民於是孝文帝詔丞相灌嬰發車騎八
萬五千詣高奴延州城本漢高奴縣舊都擊右賢王右賢王走出塞
文帝幸太原是時濟北王反文帝歸罷丞相擊胡之兵
其明年單于遺漢書曰天所立匈奴大單于敬問皇帝

無恙前時皇帝言和親事稱書意合歡漢邊吏侵侮右
賢王右賢王不請聽後義盧侯難氏等計與漢吏相距
絕二主之約離兄弟之親皇帝讓書再至發使以書報
不來漢使不至漢以其故不和鄰國不附今以小吏之
敗約故罰右賢王使之西求月氏擊之以天之福吏卒
良馬彊力以夷滅月氏盡斬殺降下之定樓蘭

漢書云
鄯善國

名樓蘭去長安

一千六百里也烏孫呼揭

揭音犁又其例反二國皆在
瓜州西北烏孫戰國時居瓜

州

及其旁二十六國皆以為匈奴諸引弓之民并為一

家北州已定願寢兵休士卒養馬除前事復故約以安邊民以應始古使少者得成其長者安其處世世平樂未得皇帝之志也故使郎中係雲淺奉書請獻橐駝

一匹騎馬二匹駕二駟

顏師古云駕可駕車也駟八足馬也

皇帝即不欲

匈奴近塞則且詔吏民遠舍使者至即遣之以六月中來至薪望之地書至漢議擊與和親孰便公卿皆曰單于新破月氏乘勝不可擊且得匈奴地澤鹵上音息非可居也和親甚便漢許之孝文皇帝前六年漢遺匈奴書

曰皇帝敬問匈奴大單于無恙使郎中係雲淺遺朕書
曰右賢王不請聽後義盧侯難氏等計絕二主之約離
兄弟之親漢以故不和鄰國不附今以小吏敗約故罰
右賢王使西擊月氏盡定之願寢兵休士卒養馬除前
事復故約以安邊民使少者得成其長者安其處世
世平樂朕甚嘉之此古聖主之意也漢與匈奴約為兄
弟所以遺單于甚厚倍約離兄弟之親者常在匈奴然
右賢王事已在赦前單于勿深誅單于若稱書意明告

諸吏使無負約有信敬如單于書使者言單于自將伐
國有功甚苦兵事服繡袷綺衣繡袷長襦錦袷袍各一
比余一黃金飾具帶一黃金胥紕一繡十匹錦三十匹
赤緇音啼綠繒各四十匹使中大夫意謁者令肩遺單于
後頃之冒頓死子稽粥立號曰老上單于老上稽粥單
于初立孝文皇帝復遣宗室女公主為單于閼氏使官
者燕人中行說行音胡郎反中
行姓說名也傳公主說不欲行漢彊
使之說曰必我行也為漢患者中行說既至因降單于

單于甚親幸之初匈奴好漢繒絮食物中行說曰匈奴人衆不能當漢之一郡然所以彊者以衣食異無仰於漢也今單于變俗好漢物漢物不過什二則匈奴盡歸於漢矣其得漢繒絮以馳草棘中衣袴皆裂敝以示不如旃裘之完善也得漢食物皆去之以示不如湏酪之便美也於是說教單于左右疏記以計課其人衆畜物

上許又反

漢遺單于書牘以尺一寸辭曰皇帝敬問匈奴大單于無恙所遺物及言語云云中行說令單于遺漢書以尺

二寸牘及印封皆令廣大長倨傲其辭曰天地所生日
月所置匈奴大單于敬問漢皇帝無恙所以遺物言語
亦云云漢使或言曰匈奴俗賤老中行說窮漢使曰而
漢俗屯戍從軍當發者其老親豈有不自脫溫厚肥美
以齋送飲食行戍乎漢使曰然中行說曰匈奴明以戰
攻為事其老弱不能鬪故以其肥美飲食壯健者蓋以
自為守衛如此父子各得久相保何以言匈奴輕老也
漢使曰匈奴父子乃同穹廬而卧父死妻其後母兄弟

死盡取其妻妻之無冠帶之飾闕庭之禮中行說曰匈奴之俗人食畜肉飲其汁衣其皮畜食草飲水隨時轉移故其急則人習騎射寬則人樂無事其約束輕易行也君臣簡易一國之政猶一身也父子兄弟死取其妻妻之惡種姓之失也故匈奴雖亂必立宗種今中國雖詳不取其父兄之妻親屬益疏則相殺至乃易姓皆從此類且禮義之敝上下交怨望而室屋之極生力必屈夫力耕桑以求衣食築城郭以自備故其民急則不習

戰功緩則罷於作業嗟土室之人顧無多辭令喋喋而
佔佔冠固何當自是之後漢使欲辯論者中行說輒曰
漢使無多言顧漢所輸匈奴繒絮米藥令其量中必善
美而已矣何以為言乎且所給備善則已不備苦惡則
候秋孰以騎馳蹂而稼穡耳日夜教單于侯利害處漢
孝文皇帝十四年匈奴單于十四萬騎入朝那蕭關殺
北地都尉印虜人民畜產甚多遂至彭陽

城字誤也括
地志云彭城

故城在涇州臨城縣東二十里果彭城
在鳩州與北地郡甚遠明非彭城也

使奇兵入燒回

中宮

括地志云秦四中宮在岐州雍縣西四十里即匈奴所燒者也

侯騎至雍甘泉

括地

志云雲陽也秦之林光宮漢之甘泉在雍州雲陽西北

八十里秦始皇作甘泉宮去長安三百里望見長安秦

皇帝以來祭天園兵處

於是文帝以中尉周舍郎中令張武為將

軍發車千乘騎十萬軍長安旁以備胡寇而拜昌侯盧

卿為上郡將軍寧侯魏遯為北地將軍隆慮侯周竈為

隴西將軍東陽侯張相如為大將軍成侯董赤

音赫

為前

將軍大發車騎往擊胡單于留塞內月餘乃去漢遂出

塞即還不能有所殺匈奴日已驕歲入邊殺略人民畜

產甚多雲中遼東最甚至代郡萬餘人漢患之乃使使遺匈奴書單于亦使當戶報謝復言和親事孝文帝後二年使使遺匈奴書曰皇帝敬問匈奴大單于無恙使當戶且居雕渠難

雕渠難者其姓名也且于余反

郎中韓遼遺朕馬二

匹已至敬受先帝制長城以北引弓之國受命單于長城以內冠帶之室朕亦制之使萬民耕織射獵衣食父子無離臣主相安俱無暴逆今聞漂惡民貪降其進取之利倍義絕約忘萬民之命離兩主之驩然其事已在

前矣書曰二國已和親兩主驩說寢兵休卒養馬世
昌樂闌然更始朕甚嘉之聖人者日新改作更始使老
者得息幼者得長各保其首領而終其天命朕與單于
俱由此道順天恤民世世相傳施之無窮天下莫不咸
便漢與匈奴鄰國之敵匈奴處北地寒殺氣早降故詔
吏遺單于絺纈金帛絲絮侘物歲有數今天下大安萬
民熙熙朕與單于為之父母朕追念前事薄物細故謀
臣計失皆不足以離兄弟之驩朕聞天不頗覆地不偏

載朕與單于皆捐往細故俱蹈大道墮壞前惡以圖長
久使兩國之民若一家子元元萬民下及魚鼈上及飛
鳥跋行喙息蠕動之類莫不就安利而辟危殆故來者
不止天之道也俱去前事朕釋逃虜民單于無言章尼
等朕聞古之帝王約分明而無食言單于留志天下大
安和親之後漢過不先單于其察之單于既約和親於
是制詔御史曰匈奴大單于遺朕書言和親已定亡人
不足以益衆廣地匈奴無入塞漢無出塞犯令約者殺

之可以久親後無咎俱便朕已許之其布告天下使明知之後四歲老上稽弼單于死子軍臣立為單于既立孝文皇帝復與匈奴和親而中行說復事之軍臣單于立四歲匈奴復絕和親大入上郡雲中各三萬騎所殺略甚衆而去於是漢使三將軍軍屯北地代屯句注趙屯飛狐口緣邊亦各堅守以備胡寇又置三將軍軍長安西細柳渭北棘門霸上以備胡胡騎入代句注邊烽火通於甘泉長安數月漢兵至邊匈奴亦去遠塞漢兵

亦罷後歲餘孝文帝崩孝景帝立而趙王遂乃陰使人於匈奴吳楚反欲與趙合謀入邊漢圍破趙匈奴亦止自是之後孝景帝復與匈奴和親通關市給遺匈奴遣公主如故約終孝景時時小入盜邊無大寇武帝即位明和親約束厚遇通關市饒給之匈奴自單于以下皆親漢往來長城下漢使馬邑下人聶翁壹斬蘭出物與匈奴交詳為賣馬邑城以誘單于單于信之而貪馬邑財物乃以十萬騎入武州塞漢伏兵三十餘萬馬邑旁御

史大夫韓安國為護軍護四將軍以伏單于單于既入漢塞未至馬邑百餘里見畜布野而無人牧者恠之乃攻亭是時鴈門尉史行微見寇葆此亭知漢兵謀單于得欲殺之尉史乃告單于漢兵所居單于大驚曰吾固疑之乃引兵還出曰吾得尉史天也天使若言以尉史為天王漢兵約單于入馬邑而縱單于不至以故漢兵無所得漢將軍王恢部出代擊胡輜重聞單于還兵多不敢出漢以恢本造兵謀而不進斬恢自是之後匈奴

絕和親攻當路塞往往入盜於漠邊不可勝數然匈奴貪尚樂關市嗜漢財物漢亦尚關市不絕以中之

如淳云得

具以利中傷之

自馬邑軍後五年之秋漢使四將軍各萬騎擊

胡關市下將軍衛青出上谷至龍城得胡首虜七百人公孫賀出雲中無所得公孫敖出代郡為胡所敗七千餘人李廣出鴈門為胡所敗而匈奴生得廣廣後得亡歸漢囚赦廣赦廣贖為庶人其冬匈奴數入盜邊漁陽尤甚漢使將軍韓安國屯漁陽備胡其明年秋匈奴二

萬騎入漢殺遼西太守略二千餘人胡又入敗漁陽太守軍千餘人圍漢將軍安國安國時千餘騎亦且盡會燕救至匈奴乃去匈奴又入鴈門殺略千餘人於是漢使將軍衛青將三萬騎出鴈門李息出代郡擊胡得首虜數千人其明年衛青復出雲中以西至隴西擊胡之樓煩白羊王於河南得胡首虜數千牛羊百餘萬於是漢遂取河南地築朔方復繕故秦時蒙恬所為塞因河為固漢亦棄上谷之什音十辟縣造陽地以予胡按曲幽辟縣入

匈奴界者造陽地并與胡也

是歲漢之元朔二年也其後冬匈奴軍

臣單于死軍臣單于弟左谷蠡王伊稚斜自立為單于

攻破軍臣單于太子於單於降漢漢封單于為浹

安侯數月而死伊稚斜單于既立其夏匈奴數萬騎入

殺代郡太守恭及略千餘人其秋匈奴又入鴈門殺略

千餘人其明年匈奴又復入代郡定襄

括地志云定襄故城在朔州善

陽縣北三百八十里地理志定襄郡高帝置也

上郡各三萬騎殺略數千人匈奴

奴右賢王怨漢奪之河南地而築朔方數為寇盜邊及

入河南侵擾朔方殺略吏民甚衆其明年春漢以衛青
為大將軍將六將軍十餘萬人出朔方高闕擊胡右賢
王以為漢兵不能至飲酒醉漢兵出塞六七百里夜圍
右賢王右賢王大驚脫身逃走諸精騎往往隨後去漢
得右賢王衆男女萬五千人裨小王十餘人其秋匈奴
萬騎入殺代郡都尉朱英略千餘人其明年春漢復遣
大將軍衛青將六將軍兵十餘萬騎乃再出定襄數百
里擊匈奴得首虜前後凡萬九千餘級而漢亦亡兩將

軍軍三千餘騎右將軍建

蘇武
父也

得以身脫而前將軍翕

侯趙信兵不利降匈奴趙信者故胡小王降漢漢封為

翕侯以前將軍與右將軍并軍分行

與大軍
別行也

獨遇單于

兵故盡沒單于既得翕侯以為自次王

自次者尊重
次于單于

用

其姊妻之與謀漢信教單于益壯絕幕以誘罷漢兵徼

極而取之

徼音古亮反徼要也要漢兵
疲極則取之無近塞居上

無近塞單于從

其計其明年胡騎萬人入上谷殺數百人其明年春漢

使驃騎將軍去病將萬騎出隴西過焉支山

焉音姻姑
地志云焉

支山一名剛丹山在甘州剛丹縣東南五十里西河故
事云匈奴祁連焉支二山乃譏曰亡我祁連山使我六
畜不蕃息失我焉支山使我婦女無顏色其慙惜乃如此
千餘里擊匈奴得胡首虜騎

萬八千餘級破得休屠王祭天金人

括地志云徑路祠神在雍州雲陽縣西北九十里甘

泉山下本匈奴祭天處秦奪其地後徙休屠王祭天金人而金佛像是其遺法立以為祭天主也

其夏驃騎將

軍復與合騎侯數萬騎出隴西北地二千里擊匈奴過居延攻

祁連山得胡首虜三萬餘人裨小王以下七十餘人是時匈奴亦

來入代郡鴈門殺略數百人漢使博望侯及李將軍出右北

平擊匈奴右賢王右賢王圍李將軍卒可四千人且盡殺虜亦

過當會博望侯軍救至李將軍得脫漢亡數千人合騎
侯後驃騎將軍期及與博望侯皆當死贖為庶人其秋單
于怒渾耶王休屠王居西方為漢所殺虜數萬人欲召誅之
渾耶王與休屠王恐謀降漢漢使驃騎將軍往迎
之渾耶王殺休屠王并將其衆降漢凡四萬餘人號十
萬於是漢已得渾邪王則隴西北地河西益少胡寇徙
關東貧民處所奪匈奴河南新秦中以實之

服虔云地名在北地

廣六七百里長安北朔方南史記以為秦始皇遣蒙恬
斥逐北故得肥饒之地七百里徙內郡人民皆往充實

之號曰新

秦中也

而減北地以西戍卒半其明年匈奴入右北

平定襄各數萬騎殺略千餘人而去其明年春漢謀曰

翁侯信為單于計居幕北以為漢兵不能至乃粟馬發

十萬騎負私從

謂負擔衣糧私慕從者凡十四萬匹

馬凡十四萬匹糧重

不與焉令大將軍青驃騎將軍去病中分軍大將軍出

定襄驃騎將軍出代咸約絕幕擊匈奴匈奴單于聞之

遠其輜重以精兵待於幕北與漢大將軍接戰一日會

暮大風起漢兵縱左右翼圍單于單于自度戰不能如

漢兵單于遂獨身與壯騎數百潰漢圍西北遁走漢兵
夜追不得行斬捕匈奴首虜萬九千級北至闐顏山趙
信城而還單于之遁走其兵往往與漢兵相亂而隨單
于單于久不與其大眾相得其右谷蠡王以為單于死乃自
立為單于真單于復得其衆而右谷蠡王乃去其單于
號復為右谷蠡王漢驃騎將軍之出代二千餘里與左
賢王接戰漢兵得胡首虜凡七萬餘級左賢王將皆遁
走驃騎封於狼居胥山禪姑衍臨翰海而還

按翰海自
一大海名

羣鳥解羽伏乳於此因名也

是後匈奴遠遁而幕南無王庭漢度河

自朔方以西至今居往往通渠置田官吏卒五六萬人

稍蠶食地接匈奴以北

匈奴舊以幕為王庭今遠徙幕北更蠶食之漢境連接匈奴舊

地以北也

初漢兩將軍大出圍單于所殺虜八九萬而漢士

卒物故亦數萬漢馬死者十餘萬匈奴雖病遠去而漢

亦馬少無以復往匈奴用趙信之計遣使於漢好辭請

和親天子下其議或言和親或言遂臣之丞相長史任

敞曰匈奴新破困宜可使為外臣朝請於邊漢使任敞

於單于單于聞敞計大怒留之不遣先是漢亦有所降
匈奴使者單于亦輒留漢使相當漢方復收士馬會驃
騎將軍去病死於是漢久不北擊胡數歲伊稚斜單于
立十三年死子烏維立為單于是歲漢元鼎三年也烏
維單于立而漢天子始出巡郡縣其後漢方南誅兩越
南越不擊匈奴匈奴亦不侵入邊烏維單于立三年漢
東越已滅南越遣故太僕賀將萬五千騎出九原二千餘里
至浮苴井而還不見匈奴一人漢又遣故從驃侯趙破

奴萬餘騎出令居數千里至匈奴河水而還亦不見匈奴一人是時天子巡邊至朔方勒兵十八萬騎以見武節而使郭吉風告單于郭吉既至匈奴匈奴主客

官名若鴻臚卿

問所使

郭吉禮卑言好曰吾見單于而口言單于見吉吉曰南越王頭已懸於漢北闕今單于能即前與漢戰天子自將兵待邊單于即不能即南面而臣於漢何徒遠走亡匿於幕北寒苦無水草之地毋為也語卒而單于大怒立斬主客見者而留郭吉不歸遷之北海上

北海即上海也蘇武亦遷也

而單于

終不肯為寇於漢邊休養息士馬習射獵數使使於漢好辭甘言求請和親漢使王烏等窺匈奴匈奴法漢使非去

節而以墨黥其面者不得入穹廬王烏北地人習胡俗去其節

照面得入穹廬單于愛之詳許甘言為遣其太子入漢為質

音政以求和親漢使楊信於匈奴是時漢東拔穢貉朝鮮以

為郡

即左菟樂浪二郡

而西置酒泉郡

今肅川

以隔絕胡與菟通

之路漢又西通月氏大夏

漢書西域傳云大月氏國去長安城萬一千六百里本居

燉煌郡連間冒頓單于破月氏而老上單于殺月氏王以頭為飲器月氏乃遠去過大菟而擊大夏而臣之都

媯水北為
王庭也

又以公主妻烏孫王以分匈奴西方之援國

又止益廣田至胘雷為塞而匈奴終不敢以為言是歲
翁侯信死漢用事者以匈奴為已弱可臣從也楊信為
人剛直屈彊素非貴臣單于不親單于欲召入不肯去
節單于乃坐穹廬外見楊信楊信既見單于說曰即欲
和親以單于太子為質於漢單于曰非故約故約漢常
遣公主給繒絮食物有品以和親而匈奴亦不擾邊今
乃欲反古令吾太子為質無幾矣

幾音記言及古
無所冀望也

匈奴

俗見漢使非中貴人其儒先以為欲說折其辭其少年
以為欲刺折其氣每漢使入匈奴匈奴輒報償漢留匈
奴使匈奴亦留漢使必得當乃肯止楊信既歸漢使王
烏而單于復調以甘言欲多得漢財物給謂王烏曰吾
欲入漢見天子面相約為兄弟王烏歸報漢漢為單于
築邸于長安匈奴曰非得漢貴人使吾不與誠語匈奴
使其貴人至漢病漢予藥欲愈之不幸而死而漢使路
充國佩二千石印綬往使因送其喪厚葬直數千金曰

此漢貴人也。單于以為漢殺吾貴使者，乃留路充國，不歸諸所言者。單于特空給王烏殊，無意入漢。及遣太子來質，於是匈奴數使奇兵侵犯邊。漢乃拜郭昌為拔胡將軍，及浞野侯屯朔方，以東備胡。路充國留匈奴三歲。單于死，烏維單于立，十歲而死。子烏師廬立，為單于。年少，號為兒單于。是歲，元封六年也。自此之後，單于益西北。左方兵直雲中，右方直酒泉、燉煌郡。

括地志云：鐵勒國，匈奴冒頓之

後在突厥國北，樂勝州經秦長城太羹長路，正北經砂磧，十三日行至其國。

兒單于立，漢使

兩使者一弔單于一弔右賢王欲以乖其國使者入匈奴匈奴悉將致單于單于怒而盡留漢使漢使留匈奴者前後十餘輩而匈奴使來漢亦輒留相當是歲漢使二師將軍廣利西伐大宛而令因杆音于將軍數築受降城其冬匈奴太雨雪畜多飢寒死兒單于年少好殺伐國人多不安左大都尉欲殺單于使人間告漢曰我欲殺單于降漢漢遽即兵來迎我我即發初漢聞此言故築受降城猶以為遠其明年春漢使浞野侯破奴將二

萬餘騎出朔方西北二千餘里期至浚稽山而還浞野
侯既至期而還左大都尉欲發而覺單于誅之發左方
兵擊浞野浞野侯行捕首虜數千人還未至受降城四
百里匈奴兵八萬騎圍之浞野侯夜自出求水匈奴閒
捕生得浞野侯因急擊其軍軍中郭縱為護維王為渠
為渠帥也相與謀曰及諸校尉畏亡將軍而誅之莫相勸歸
軍遂沒於匈奴匈奴兒單于大喜遂遣奇兵攻受降城
不能下乃寇入邊而去其明年單于欲自攻受降城未

至病死兒單于立三歲而死子年少匈奴乃立其季父

烏維單于弟右賢王响犁湖為單于是歲太初三年也

响犁湖單于立漢使光祿徐自為出五原塞

即五原郡榆林塞也

在勝州榆林縣四十里也

數百里遠者千餘里築城鄣列亭

顧胤云鄣山中小城

亭侯望

至廬昫

括地志云五原郡相陽縣北出石門鄣得光祿城又西北得支就縣又西北得

所居也

頭曼城又西北得牢城河又西北得富房城按即築城鄣列亭至膚胸也服虔云廬匈奴地名也張晏云山名

而使游擊將軍韓說長平侯衛伉屯其旁使彊弩都

尉路博德築居延澤上

括地云漢居延縣故城在甘州張掖縣東北千五百三十里有

漢遼虜郭强弩尉路博德之所築李陵敗與士衆期至遼虜郭即此也長老傳云郭北百八十里直居延之西北是李陵戰地也其秋匈奴大入定襄雲中殺略數千人敗數

二千石而去行破壞光祿所築城列亭郭又使右賢王入酒泉張掖略數千人會任文擊救盡復失所得而去是歲貳師將軍破大宛斬其王而還匈奴欲遮之不能至其冬欲攻受降城會單于病死匈奴單于立一歲死匈奴乃立其弟左大都尉且鞮侯為單于漢既誅大宛威震外國天子意欲遂困胡乃下詔曰高皇帝遺朕

平城之憂高后時單于書絕悖逆昔齊襄公復百世之
讎春秋大之是歲太初四年也且鞮侯單于既立盡歸
漢使之不降者路充國等得歸單于初立恐漢襲之乃
自謂我兒子安敢望漢天子漢天子我丈人行也

胡即反

漢遣中郎將蘇武厚幣賂遺單于單于益驕禮甚倨非
漢所望也其明年浞野侯破奴得亡歸漢其明年漢使
貳師將軍廣利以三萬騎出酒泉擊右賢王於天山

在伊

川得胡首虜萬餘級而還匈奴大圍貳師將軍幾不脫

漢兵物故什六七漢復使因杆將軍數出西河與彊弩

都尉會涿涂山

匈奴中
山也

毋所得又使騎都尉李陵將步

騎五千人出居延北千餘里與單于會合戰陵所殺傷

萬餘人兵及食盡欲解歸匈奴圍陵降匈奴其兵遂沒

得還者四百人單于乃貴陵以其女妻之後二歲復使

貳師將軍將六萬騎步兵十萬出朔方彊弩都尉路博

德將萬餘人與貳師會游擊將軍說將步騎三萬人出

五原因杆將軍數將萬騎步兵三萬人出鴈門匈奴聞

悉遠其累重於余吾水北

累力為反
重大用反

而單于以十萬騎

待水南與貳師將軍接戰貳師乃解而引歸與單于連

戰十餘日貳師聞其家以巫蠱族滅因并衆降匈奴得

來還千人一兩人耳

自此以下上至貳師聞其家
非天漢四年事似錯悞人所知

游擊

說無所得因杆數與左賢王戰不利引歸是歲漢兵之

出擊匈奴者不得言功多少功不得御

御音語其功不
得相御當也

有詔捕太醫令隨但言貳師將軍家室族滅使廣利得

降匈奴

太史公曰孔氏著春秋隱桓之間則章至定哀之際則微為其切當世之文而罔褒忌諱之辭也世俗之言匈奴者患其微一時權而務調納其說以便偏指不參彼己將率席中國廣大氣奮人主因以決策是以建功不深堯雖賢興事業不成得禹而九州寧

言堯雖賢聖不能獨理得禹而

九州安寧以刺武帝不能擇賢將相而務諂納小人浮說多伐匈奴故壞齊民故太史公引禹聖成其太平以攻當代之罪且欲興聖統唯在擇任將相哉唯在擇任將相

哉

史記正義卷一百十